

## Štyrjoch kandidatow namjetowali

**Wólby Serbskeho sejma podpěruje dalša politiska strona. Džělowy kruh Serbja pola krajneho předsydstwa SPD Sakskeje je to wčera w Kamjencu z jednym hłosawzdaćom wobzamknył a jednu kandidatku a třoch kandidatow za legitimowane serbske ludowe zastupnistwo namjetował.**

**Kamjenc (SN/at).** „Chcemy w SPD kóždežkuli demokratiske zakładne hibanje spěchować. Podpěrujemy to, chcedža-li so ludžo aktiwizować“, zahaji nawoda džěloweho kruha Serbja w krajnym předsydstwje SPD Sakskeje Benedikt Dyrlich rozjimanje naležnosće na wčerawšim zetkanju cyłka. Towaršojo měli so k tomu wuprajíc. A diskusija wuwi so hnydom na zasadnu wuměnu myslow. Předsyda Budyskeho městneho towarstwa SPD a iniciatiwnik dr. Měrcin Krawc přirunowaše serbski třěšny zwjazk a Serbski sejm: „Domowina móže jeno zastupjerka zajimow być. Pobrachowaceje alternatiwy dla wona za Serbow dotal jeno rěči.“ Krawc wužiwaše wobraz wo „wutrobje, kotraž Domowina je a wostanje“. Parlament ma wón za hłowu. „Sejm a Domowina, to je zhromadne džělo hłowy a wutroby.“ Benjamin Wirth parowaše w Měrcina Krawcowym wobrazu čělo mjenowaneje wutroby a hłowy. Potajkim serbski lud, kotryž „za wólby přizjewjeni wolerjo njezaručaja“. Wirthej pobrachuje instrument, wutworić serbsku wolu jako wuchadžišćo za parlament. Zapóslanc Sakskeho krajneho sejma a rěčnik frakcije SPD za serbske naležnosće Harald Baumann-Hasske je k rozmyslowanju dał, zo tuchwilu „serbski lud za sebje žane naroki formulować njemóže“.

Přitomni su so z jednym hłosawzdaćom za to wuprajili wólby Serbskeho sejma podpěrać. Do předstajenja kandidatow džěloweho kruha SPD za tajki wustaja Benedikt Dyrlich, zo nochce „docpěteje staroby dla žane politiske zastojnstwo hižo njewukonjeć“. Tak wón, kiž bě iniciatiwu za sejm sobu založil, móžnu kandidaturu wuzamkuje.

Christine Ruby z Drježdžan, Konrad Skatula z Kamjenca, Sven Scheidemantel z Wachauwa a dr. Měrcin Krawc z Delnjeho Wunjowa dóstachu dowěru přitomnych. Woni su namjetowani jako kandidaća za wólby serbskeho parlamenta.

Čłonojo džěloweho kruha maja za trěbne, ludži namołwić so jako wolerjo registrować dać. W septembrje chcedža na wólbne zarjadowanje přeprosyc.